

Hukumu Ya Kusherehekeea Maulidi


Mwandishi:

Imaam Swaalih bin Fawzaan al-Fawzaan

Tarjama:

Wanachuoni.com

Utangulizi	3
Hukumu ya kusherehekea Maulidi	7
Kuzijadili shubuha na watetezi wa Maulidi.....	11
1. Kusherehekea Maulidi ni kumuadhimisha Mtume ('alayhis-Salaam).....	11
2. Maulidi yanafanywa na watu wote ulimwenguni	12
3. Kusherehekea Maulidi ni kumkumbuka Mtume ('alayhis-Salaam).....	14
4. Maulidi yalianzisha mfalme mwema	16
5. Maulidi ni katika Bid'ah nzuri	17
6. Kukusanya Qur-aan, Tarawiyh na kuandika Hadiyth ni Bid'ah pia!	19
7. Kusherehekea Maulidi ni alama yenye kuonesha kumpenda Mtume ('alayhis-Salaam)	21
8. Kusherehekea Maulidi ni uhamasisho wa kumuiga Mtume ('alayhis-Salaam)	23
Khitimisho	24



Utangulizi

Himdi zote zinamstahiki Allaah, Mola wa walimwengu. Swalah na salaam zimwendee Mtume wetu Muhammad, ahli zake na Maswahabah zake wote.

Amma ba'd:

Maamrisha yaliyothibiti katika Qur-aan na Sunnah juu ya kufuata yale aliyoweka Allaah na Mtume Wake na makatazo ya kuzua katika Bid'ah ni kitu chenye kujulikana fika. Allaah (Ta'ala) amesema:

فُلٌ إِنْ كُنْتُمْ تُحِبُّونَ اللَّهَ فَاتَّبِعُونِي يَخِبِّئُكُمُ اللَّهُ وَيَعْفُرْ لَكُمْ ذُنُوبَكُمْ

"Sema: "Mkiwa mnampenda Allaah, basi nifuateni, Atakupendeni Allaah na Atakusameheeni dhambi zenu." (03:31)

اتَّبِعُوا مَا أُنزِلَ إِلَيْكُمْ مِّنْ رَّبِّكُمْ وَلَا تَتَّبِعُوا مِنْ دُونِهِ أُوْلَيَاءَ ۖ قَلِيلًا مَا تَذَكَّرُونَ

"Fuateni yale mliyoteremshiwa kutoka kwa Mola wenu na wala msifuate walinzi badala Yake - ni machache mnayoyakumbuka." (07:03)

وَأَنَّ هَذَا صِرَاطِي مُسْتَقِيمًا فَاتَّبِعُوهُ ۖ وَلَا تَتَّبِعُوا السُّبُلَ فَتَفَرَّقَ بِكُمْ عَنْ سَبِيلِهِ

"Hii ndio njia Yangu, [njia] iliyonyooka; basi ifuateni na wala msifuate vichochoro [vinginevyo]; vikakufarikisheni na njia Yake!" (06:153)

Mtume (Swalla Allaahu 'alayhi wa sallam) amesema:

"Hakika maneno ya kweli kabisa ni Kitabu cha Allaah na uongofu bora ni wa Muhammad (Swalla Allaahu 'alayhi wa sallam) na mambo maovu kabisa ni yale yakuzua."

Amesema (Swalla Allaahu 'alayhi wa sallam):

"Atakayezua katika amri yetu hii yasiyokuwemo, atarudishiwa mwenyewe."¹

Katika upokezi wa Muslim imekuja:

"Atakayefanya 'amali isiyokuwemo humo amri yetu, atarudishiwa mwenyewe."²

Miongoni mwa jumla ya mambo ambayo watu wamezua ambayo ni katika Bid'ah ovu ni kusherehekeza ukumbusho wa Maulidi ya Mtume katika Rabiy' al-Awwal. Kuna sura mbali mbali za kusherehekeza:

Ya kwanza: Kuna ambao wanayafanya kwa kukusanyika na wanasoma kisa cha Maulidi au kunasomwa Khutbah na Qaswiyyah katika mnasaba huu.

Ya pili: Wengine wanatengeneza chakula, vitu tamtam [haluwa] na vinginevyo na kuwapa wale waliohudhuria.

Ya tatu: Kuna wanaosherekeza Misikitini.

Ya nne: Kuna wanaosherekeza manyumbani.

Ya tano: Kuna wengine hawatosheki na haya yaliyotajwa; wanaongezea juu ya mkusanyiko huu mambo ya haramu na maovu katika kuchanganyika wanaume na wanawake, kucheza na kuimba, matendo ya kishiriki kama kumuomba uokozi Mtume (Swalla Allaahu 'alayhi wa sallam), kumnadi, kumuomba nusura dhidi ya maadui na mengineyo.

¹ al-Bukhaariy (2697).

² Muslim (1718).

Pasi na kujali ni sura ipi inayotumiwa na malengo yepi ya wafanyaji ni kitu kisichokuwa na shaka yoyote kabisa juu ya kwamba ni Bid'ah iliyoharamishwa na iliyozuliwa.

Maulidi ni Bid'ah iliyozua Shiy'ah Faatwimiyyuun baada ya karne tatu bora kwa lengo la kuharibu dini ya waislamu. Mtu wa kwanza kuzua Bid'ah hii ni mfalme Mudhwaffar Abu Sa'iyd Kawkabuuriy ambaye alikuwa ni mfalme wa Irbil mwishoni mwa karne ya sita au mwanzoni mwa karne ya saba Hijriy. Haya yametajwa na wanahistoria mmoja wapo akiwa ni Ibn Kathiyr, Ibn Khalkaan na wengineo.

Abu Shaamah amesema:

"Mtu wa kwanza kufanya hilo Muusul ilikuwa ni Shaykh 'Umar bin Muhammad al-Mulla. Alikuwa ni mmoja katika watu wema anayejulikana. Baada ya hapo akaigwa na watu wa Irbil na wengineo."

Haafidhw Ibn Kathiyr amesema katika "al-Bidaayah" wakati alipokuwa akielezea wasifu wa Sa'iyd Kawkabuuriy:

"Alikuwa akifanya Maulidi katika Rabiy' al-Awwal na akifanya bonge la sherehe... " mpaka aliposema: "... as-Sibtw amesema: "Baadhi ya waliohudhuria harakati za Mudhwaffar katika baadhi ya Maulidi wameeleza kuwa alikuwa akitoa idadi ya kondoo 5.000 wakubwa waliochomwa, kuku 10.000, bakuli 1.000 za malai [cream] na sahani 30.000 za vitu tamtam... " mpaka aliposema: "... alikuwa akiwaacha Suufiyyah wakiimba kuanzia Dhuhr mpaka Fajr na yeye akishirikiana nao katika kucheza."³

Ibn Khalkaan amesema katika "Wafiyaat al-A'yaam":

"Inapofika mwanzoni mwa mwezi wa Swafar makuba yanapambwa kwa mapambo mbali mbali yenyeye fakhari na ya kupendeza. Katika kila kuba kunakaa kundi la waimbaji, wenye kuchezesha vibonzo⁴ na kundi la wanamuziki. Hakuna kuba iliokuwa ikiachwa isipokuwa ina wasanii. Katika kipindi hichi watu huacha

³ al-Bidaayah wan-Nihaayah (13/137).

⁴ Tazama <http://en.wikipedia.org/wiki/Puppeteer>

kazi zingine zote. Wakizunguka huku na huku na kuangalia burudani... " mpaka aliposema: "... inapokaribia kufika siku ya Maulidi kabla ya siku mbili wanatoa idadi kubwa ya ngamia, ng'ombe na wanyama wengine na wakifuatana nao huku wakiwa pamoja na vyombo vyao vya muziki mpaka wanapofika nazo kwenye uwanja... " mpaka aliposema: "... usikuwa wa Maulidi kunaimbwaa Anashiyd kwenye nyumba baada ya kuswali Maghrib."⁵

Hiki ndio chanzo cha kuzuka sherehe ya Maulidi. Ni kitu kilichozushwa kipindi cha nyuma na yameambatanishwa na pumbao, ubadhirifu na kupoteza mali na wakati ambapo wamezua Bid'ah ambayo Allaah hakuteremsha dalili yoyote juu yake.

Kinachotakikana kwa muislamu ni kuhuisha Sunnah na kufisha Bid'ah. Muislamu hatakiwi kukimbilia kufanya kitendo chochote mpaka kwanza ajue hukumu ya Allaah juu yake.

⁵ Wafiyaat al-A'yaam (03/274).

Hukumu ya kusherehekeea Maulidi

Kusherehekeea Maulidi sio katika Sunnah ya Mtume (Swalla Allaahu 'alayhi wa sallam) wala sio Sunnah ya makhaliyfah wake. Kusherehekeea Maulidi katika mnasaba wa kuzaliwa kwa Mtume (Swalla Allaahu 'alayhi wa sallam) ni kitu kimechokatazwa na kurudishwa kwa njia nyingi:

1- Haikuwa katika Sunnah ya Mtume (Swalla Allaahu 'alayhi wa sallam) wala makhaliyfah wake. Mambo yakishakuwa ni hivyo basi ni Bid'ah iliyokatazwa. Mtume (Swalla Allaahu 'alayhi wa sallam) amesema:

"Jilazimieni na Sunnah zangu na Sunnah za makhaliyfah wangu waongofu baada yangu. Shikamaneni nazo bara bara na ziumeni kwa magego yenu. Tahadharini na mambo ya kuzua! Hakika kila kitachozuliwa ni Bid'ah na kila Bid'ah ni upotevu."⁶

2- Kusherekeea Maulidi ni Bid'ah iliyozua Shiy'ah Faatwimiyyuun baada ya karne bora kwa lengo la kuiharibu dini ya waislamu. Mwenye kufanya kitu kwa nia ya kujikurubisha kwa Allaah (Ta'ala) na kitu hicho kikawa hakikufanywa na Mtume (Swalla Allaahu 'alayhi wa sallam), hakukiamrisha na wala hakikufanywa na makhaliyfah wake baada yake basi kitendo chake ni kumtuhumu Mtume kuwa hakuwabainishia watu dini yao. Isitoshe vilevile jengine ni kuikadhibisha Kauli ya Allaah (Ta'ala):

الْيَوْمَ أَكْمَلْتُ لَكُمْ دِينَكُمْ

"Leo Nimekukamilishi Dini yenu." (05:03)

Hilo ni kwa sababu amekuja na jipya ambalo anadai kuwa ni sehemu katika dini ilihali halikuleta Mtume (Swalla Allaahu 'alayhi wa sallam).

3- Kusherehekeea Maulidi ni kujifananisha na manaswara ambao wanasherehekeea kuzaliwa kwa Mtume 'Iysaa ('alayhis-Salaam). Kujifananisha na manaswara ni

⁶ Ahmad (16692) at-Tirmidhi (2676).

jambo lililoharamishwa vibaya sana. Kumekuja katika Hadiyth makatazo ya kujifananisha na makafiri na maamrishi ya kwenda kinyume nao. Mtume (Swalla Allaahu 'alayhi wa sallam) amesema:

"Yule mwenye kujifananisha na watu basi yeye ni katika wao."

Ameipokea Ahmad, Abu Daawuud na Ibn Taymiyyah amesema kuwa mlolongo wa wapokezi wake ni mzuri katika "Iqtidhwaa'-is-Swiraat al-Mustaqiyim" na as-Suyuutwiy amesema kuwa ni Hasan katika "al-Jaamiy' as-Swaghiyr."

Katika upokezi mwingine amesema (Swalla Allaahu 'alayhi wa sallam):

"Jitofautisheni na washirikina."

Ameipokea Muslim.

Kujitofautisha huku khaswa inapokuja katika nembo za dini zao.

4- Kusherehekea kuzaliwa kwa Mtume (Swalla Allaahu 'alayhi wa sallam), mbali na kuwa ni Bid'ah na ni kujifananisha na manaswara - na yote hayo mawili ni haramu - ukiongezea juu ya hayo vilevile ni njia inayopelekea katika kuvuka mipaka na kupitiliza katika kumuadhimisha kwa kiasi cha kwamba anafikia mpaka kuombwa na kumtaka uokozi (Swalla Allaahu 'alayhi wa sallam) badala ya Allaah. Huo ndio uhakika wa mambo yanayofanywa na wale wenye kusherehekea Bid'ah ya Maulidi ambapo wanamuomba Mtume (Swalla Allaahu 'alayhi wa sallam) badala ya Allaah, kumtaka msaada na kuimba Qaswiydah za shirki wakati wa kumsifu. Moja katika Qaswiydah hizi ni Qaswiydah ya al-Burdaa na nyinginez. Mtume (Swalla Allaahu 'alayhi wa sallam) amekataza kupitiliza katika kumsifu pindi aliposema:

"Msipitilize [katika kunisifu] kama walivyopitiliza maswara kwa mwana wa Maryam. Hakika mimi ni mja. Hivyo basi, semenii "mja wa Allaah na Mtume Wake"."

Ameipokea al-Bukhaariy.

Maana yake ni kwamba msivuke mipaka katika kunisifu na kuniadhimisha kama walivofanya manaswara katika kumsifu na kumuadhimisha 'Iysaa (Swalla

Allaahu 'alayhi wa sallam) mpaka wakafikia kumuabudu yeye badala ya Allaah. Isitoshe Allaah amewakataza hilo pale aliposema:

يَا أَهْلَ الْكِتَابِ لَا تَعْلُمُونِي فِي دِينِكُمْ وَلَا تَنْفُوْلُوا عَلَى اللَّهِ إِلَّا الْحَقُّ إِنَّمَا الْمُسِيْخُ عِيسَى ابْنُ مَرْيَمَ رَسُولُ اللَّهِ وَكَلِمَتُهُ أَقْلَاهَا إِلَيْيَّ
مَرْيَمَ وَرُوحُ مِنْهُ

"Enyi watu wa Kitabu! Msipindukie mipaka katika dini yenu, wala msiseme juu ya Allaah isipokuwa ukweli. Hakika *Al-Masiyh'* Iysaa mwana wa Maryam ni Mtume wa Allaah na ni neno Lake [la Kun!] Alompelekea Maryam na *Ruwhun* [roho Aloumba kwa amrisho] kutoka Kwake." (04:171)

Mtume (Swalla Allaahu 'alayhi wa sallam) ametukataza na kuvuka mipaka kwa kuchelea tusije kufikwa na yaliyowafika wao. Mtume (Swalla Allaahu 'alayhi wa sallam) amesema:

"Tahadharini na kuvuka mipaka! Hakika kilichowafanya kuangamia waliokuwa kabla yenu ilikuwa ni kuvuka mipaka."

Ameipokea an-Nasaa'iy na ni Swahiyh kwa mujibu wa al-Albaaniy katika "Swahiyh Sunan" ya an-Nasaa'iy.

5- Kuhuisha Bid'ah ya Maulidi ni jambo linalofungua mlango wa Bid'ah nyinginezo na kujishughulisha nazo badala ya Sunnah. Kwa ajili hii ndio maana utaona watu wa Bid'ah ni wenyе bidii kweli kweli ya kuhuisha mambo ya Bid'ah na wakati huo huo wamezembea katika Sunnah. Sivyo tu bali wanaichukia na kuwafanya uadui Ahl-us-Sunnah. Kiasi cha kwamba dini yao yote sasa imekuwa ni kuhuisha kumbukumbu za ki-Bid'ah na Maulidi. Wamegawanyika mapote mbali mbali ambapo kila pote limehuisha Maulidi ya wanachuoni wao; mfano wa Maulidi hayo ni Maulidi ya al-Badawiy, Ibn 'Arabiyy, ad-Dasuukiy na ash-Shaadhiyy. Maulidi haya hayaishi isipokuwa kunakuja mengine wanayo jishughulisha nayo. Hilo limeleta natija ya kuvuka mipaka kwa wafu hawa na wengineo ambapo wanawaomba badala ya Allaah na kuamini kuwa wananaufaisha na wanadhuru. Kitendo hichi kimefanya kuwatoa katika Uislamu na kurudi katika dini za kishirikina ambazo Allaah amesema juu yake:

وَيَعْبُدُونَ مِنْ دُونِ اللَّهِ مَا لَا يَضُرُّهُمْ وَلَا يَفْعُلُونَ هُؤُلَاءِ شُفَاعَاؤُنَا عِنْدَ اللَّهِ

"Na wanaabudu asiyekuwa Allaah ambao [hawawezi] kuwadhuru na wala [hawawezi] kuwanufaisha, na wanasema: "Hawa ni waombezi wetu mbele ya Allaah"." (10:18)

وَالَّذِينَ اتَّخَذُوا مِنْ دُونِهِ أُولَئِكَ مَا نَعْبُدُهُمْ إِلَّا لِيُقْرِبُونَا إِلَى اللَّهِ بُرْقَى

"Na wale waliojichukulia badala Yake walinzi [wakisema]: "Hatuwaabudu isipokuwa kwa lengo la kutukurubisha kwa Allaah ukaribu"." (39:03)

Kuzijadili shubuha na watetezi wa Maulidi

Kusherehekea Maulidi ni kumuadhimisha Mtume (‘alayhis-Salaam)

1- Wanadai kuwa kwa kufanya hivo wanamuadhimisha Mtume (Swalla Allaahu ‘alayhi wa sallam).

Tunajibu hilo kwa kusema kumuadhimisha Mtume (Swalla Allaahu ‘alayhi wa sallam) inakuwa kwa kumfuata na kutekeleza maamrisho yake na kujiepusha na makatazo yake na kumpenda (Swalla Allaahu ‘alayhi wa sallam) na sio kumuadhimisha kwa mambo ya Bid’ah na ukhurafi na madhambi. Yote haya tuliyoyata yanapatikana katika sherehe za Maulidi kwa kuwa ni kitendo cha madhambi.

Watu waliokuwa wakimuadhimisha Mtume (Swalla Allaahu ‘alayhi wa sallam) kwa upeo wa hali ya juu ni Maswahabah (Radhiya Allaahu ‘anhum). ‘Urwah bin Mas’uud alisema kuwaambia Quraysh:

"Enyi watu wangu! Nimemtembelea Kisraa, wafalme, Qayswar na Najashiy. Ninaapa kwa Allaah ya kwamba sijaona mfalme yoyote anayeadhimishwa na watu wake kama jinsi Maswahabah wa Muhammad (Swalla Allaahu ‘alayhi wa sallam) wanavyomuadhimisha Muhammad (Swalla Allaahu ‘alayhi wa sallam)."

Ameipokea al-Bukhaariy.

Pamoja na maadhimisho yote haya siku ya kuzaliwa kwake hawakufanya ikawa ni sikukuu na sherehe. Lau jambo hilo ingelikuwa limewekwa katika Shari’ah, basi wasingeliacha.

Maulidi yanafanywa na watu wote ulimwenguni

2- Wanatumia hoja kwa kusema kuwa haya ni matendo yanayofanywa na watu wengi katika miji mingi.

Tunajibu hilo kwa kusema hoja iko katika yale yaliyothibiti kutoka kwa Mtume (Swalla Allaahu 'alayhi wa sallam). Kilichothibiti kutoka kwa Mtume (Swalla Allaahu 'alayhi wa sallam) ni kukataza Bid'ah kwa sampuli zake zote na hii - yaani Maulidi - ni moja wapo. Matendo ya watu yanapoenda kinyume na dalili hayakutumiwi kuwa ni hoja. Haijalishi kitu hata kama yatafanywa kwa wingi:

وَإِنْ تُطْعِنْ أَكْثَرَ مَنْ فِي الْأَرْضِ يُضْلُّوكَ عَنْ سَبِيلِ اللَّهِ

"Na kama ukiwatii wengi walioko ulimwenguni, watakupoteza na njia ya Allaah." (06:116)

Pamoja na kuwa katika kila zama bado wanakuwepo watu wenye kukemea Bid'ah hii na kubainisha ubatili wake. Hakuna hoja kwa yule mwenye kuendelea kuihuisha baada ya kubainikiwa na haki.

Miongoni mwa waliokemea kusherehekea Maulidi katika mnasaba huu ni pamoja na hawa wafuatao:

- a) Shaykh-ul-Islaaam Ibn Taymiyyah katika "Iqtidhwaa'-is-Swiraat al-Mustaqiyim"
- b) Imaam ash-Shaatwibiy katika "al-I'tiswaam"
- c) Ibn Hajj katika "al-Madkhal"
- d) Shaykh Taaj-ud-Diyn 'Aliy bin 'Umar al-Lakhmiy ameandika kitabu cha kipekee akikemea Maulidi.
- e) Shaykh Muhammad Bashiyr as-Sahsawaaniy al-Hindiy ameyakemea katika kitabu chake "Swiyaanat-ul-Insaan"
- f) Muhammad Rashiyd ar-Ridhwaa ameandika kijitabu cha kipekee kuhusu Maulidi

g) Shaykh Muhammad bin Ibraahiyim Aal as-Shaykh ameandika kijitabu cha kipekee kuhusu Maulidi

h) Shaykh 'Abdul-'Aziyy bin Baaz

Kuna wengineo mbali na watu hawa bado mpaka hii leo wanaendelea kuandika kukemea Bid'ah hii kila mwaka kwenye magazeti na vipeperushi wakati kunapofanywa Bid'ah hii.

Kusherehekeea Maulidi ni kumkumbuka Mtume (‘alayhis-Salaam)

3- Katika kusherehekeea Maulidi kuna kuhuisha kumkumbuka Mtume (Swalla Allaahu ‘alayhi wa sallam).

Tunajibu hilo kwa kusema ya kwamba kuhuisha kumkumbuka Mtume (Swalla Allaahu ‘alayhi wa sallam) ni kitu anachokifanya muislamu na amefungamana nacho kila kunapotajwa jina lake (Swalla Allaahu ‘alayhi wa sallam) katika adhaana, Iqaamah, Khutbah, anapotamka Shahaadah mbili baada ya kutawadha, anapomswalia Mtume (Swalla Allaahu ‘alayhi wa sallam) katika Tashahhud, kila kunapotajwa jina lake (Swalla Allaahu ‘alayhi wa sallam) na kila pale ambapo muislamu anafanya tendo jema - sawa ikiwa ni cha wajibu au kilichopendekezwa miongoni mwa yale yaliyoweka Mtume (Swalla Allaahu ‘alayhi wa sallam) katika Shari‘ah - kwa kufanya hivo anakuwa ni mwenye kumkumbuka na anaandikiwa ujira sawa na ujira wa mtendaji. Kwa njia hii umri wote wa muislamu anakuwa ni mwenye kuhuisha ukumbusho wa Mtume katika yale aliywewka Allaah katika Shari‘ah na anakuwa ni mwenye kufungamana naye usiku na mchana. Na si kumkumbuka wakati wa kuzaliwa tu jambo ambalo ni Bid‘ah na ni kwenda kinyume na Sunnah yake. Hakika kusherehekeea Maulidi ni kitu kinachomtenga na kumuweka mtu mbali na Mtume (Swalla Allaahu ‘alayhi wa sallam). Mtume (Swalla Allaahu ‘alayhi wa sallam) ni mwenye kujitosheleza na sherehe hii ya ki-Bid‘ah kwa yale aliyomuwekea Allaah katika Shari‘ah pale alipomuadhimisha na kumheshimisha. Allaah (Ta‘ala) amesema:

وَرَفَعْنَا لَكَ ذِكْرَكَ

"Na Tukanyanyulia juu utajo wako." (94:04)

Allaah anapotajwa katika adhaana, Iqaamah na Khutbah basi kunaambatanishwa pia jina la Mtume (Swalla Allaahu ‘alayhi wa sallam). Hilo limetosheleza kuwa ni uadhimisho na mapenzi na kumbukumbu kwa yule anayetaka kumkumbuka Mtume (Swalla Allaahu ‘alayhi wa sallam).

Allaah (Subaahahu wa Ta'ala) hakukipa umuhimu kuzaliwa kwa Mtume (Swalla Allaahu 'alayhi wa sallam). Alichotilia umuhimu ni kule kutumilizwa kwake pale aliposema:

هُوَ الَّذِي بَعَثَ فِي الْأُبَيْنَ رَسُولًا مِّنْهُمْ

"Yeye Ndiye Aliyepeleka Mtume kwa watu wasiojua kusoma wala kuandika." (62:02)

Maulidi yalianzisha mfalme mwema

4- Sherehe ya Maulidi ni kitu kilichozua mfalme mwadilifu na msomi ambaye lengo lake ilikuwa ni kujikurubisha kwa Allaah.

Tunajibu hilo kwa kusema kuwa Bid'ah haikubaliwi kutoka kwa mtu yoyote. Malengo mazuri hayafanyi kitendo kiovu kuwa kizuri. Kuwa kwake msomi na mwadilifu haina maana kuwa amekingwa na kukosea.

Maulidi ni katika Bid'ah nzuri

5- Wanasema kuwa kufanya Maulidi ni mionganini mwa Bid'ah nzuri kwa sababu maana yake ni kuonesha shukurani kwa kule kupatikana kwa Mtume mtukufu.

Tunajibu hilo kwa kusema hakuna kitu kizuri katika Bid'ah. Mtume (Swalla Allaahu 'alayhi wa sallam) amesema:

"Atakayezua katika amri yetu hii yasiyokuwemo, atarudishiwa mwenyewe."

Ameipokea al-Bukhaariy.

Amesema (Swalla Allaahu 'alayhi wa sallam):

"Hakika ya kila Bid'ah ni upotevu."

Ameipokea Ahmad na at-Tirmidhiy.

Amehukumu kuwa Bid'ah zote ni upotevu. Huyu - yaani anayesema kuwa Maulidi ni Bid'ah nzuri - anasema kuwa sio kila Bid'ah ni potevu, zipo Bid'ah ambazo ni nzuri! Haafidhw Ibn Rajab amesema katika "Sharh Arba'iyn":

"Maneno yake (Swalla Allaahu 'alayhi wa sallam):

"Kila Bid'ah ni upotevu" ni katika maneno ya kina na hakuvuliwi kitu. Maneno haya ni msingi mkubwa mionganini mwa misingi ya dini. Maneno haya yamefanana na kauli yake (Swalla Allaahu 'alayhi wa sallam): "Atakayezua katika amri yetu hii yasiyokuwemo, atarudishiwa mwenyewe." Kwa hivyo kila mwenye kuzua jambo na akalinasibisha katika dini - na jambo hilo likawa halina msingi katika dini ambao linajengwa juu yake - ni upotevu na dini imetakasika na jambo hilo. Haijalishi kitu ikiwa ni katika mambo ya I'tiqaad, matendo au maneno ya kidhahiri na yaliyojificha".

Watu hawa hawana hoja yoyote juu ya kwamba kuna Bid'ah nzuri. Hoja wanayotumia ni maneno ya 'Umar bin al-Khattaab (Radhiya Allaahu 'anh) kuhusu swalah ya Tarawiyh pale aliposema:

"Ni neema ya Bid'ah iliyoje hii!"

Kukusanya Qur-aan, Tarawiyh na kuandika Hadiyth ni Bid'ah pia!

6- Hoja yao nyingine wanasema kuwa kuna mambo yaliyozuliwa ambayo Salaf hawakuyapinga. Moja katika mambo hayo ni kuikusanya Qur-aan sehemu moja na kuandika Hadiyth katika vitabu.

Tunajibu hilo kwa kusema kwamba mambo haya yana msingi katika Shari'ah na hayakuzuliwa. Kuhusiana na maneno ya 'Umar bin al-Khattaab (Radhiya Allaahu 'anh) aliposema:

"Ni neema ya Bid'ah iliyoje hii!"

anachokusudia ni Bid'ah ya kilugha na si ya Kishari'ah. Kunaposemwa kuwa jambo fulani ni Bid'ah miongoni mwa mambo ambayo yana msingi katika Shari'ah ambayo yanautegemea, basi kunamaanishwa Bid'ah ya kilugha na si ya Kishari'ah. Kwa sababu Bid'ah ya Kishari'ah ni ile ambayo haina msingi unaotegemewa katika Shari'ah.

Kukusanya Qur-aan sehemu moja ni jambo lililo na msingi katika Shari'ah. Mtume (Swalla Allaahu 'alayhi wa sallam) alikuwa akiamrisha Qur-aan iandikwe. Lakini hata hivyo ilikuwa inaandikwa sehemu mbali mbali. Ndipo Maswahabah (Radhiya Allaahu 'anhum) wakawa wameikusanya kwenye Kitabu kimoja ili kuilinda.

Kuhusiana na Tarawiyh Mtume (Swalla Allaahu 'alayhi wa sallam) aliiswali pamoja na Maswahabah zake kwa masiku kadhaa. Lakini hata hivyo akawa ameacha kuendelea kuswali nao kwa kuchelea isije ikafaradhishwa kwao. Maswahabah (Radhiya Allaahu 'anhum) wakaendelea kuiswali kila mtu kivyake wakati ambapo Mtume (Swalla Allaahu 'alayhi wa sallam) alikuwa bado yuhai na baada ya kufa kwake. Hali iliendelea hivyo mpaka hapo 'Umar bin al-Khattaab (Radhiya Allaahu 'anh) alipowakusanya nyuma ya imamu mmoja kama walivyokuwa wakiswali nyuma ya Mtume (Swalla Allaahu 'alayhi wa sallam). Huku sio kuzua katika dini.

Kadhalika inahusiana na kitendo cha kuandika Hadiyth. Ni kitu kilicho na msingi katika dini. Mtume (Swalla Allaahu 'alayhi wa sallam) aliwaamrisha

baadhi ya Maswahabah zake kuandika Hadiyth kadhaa pindi walipokuwa wamemwomba hilo. Mwanzoni alipokuwa amewakataza kufanya hivo kwa sura ya kijumla pindi alipokuwa bado yuko hai (Swalla Allaahu 'alayhi wa sallam) ilikuwa ni kwa sababu ya kuchelea Qur-aan isije ikachanganyike na kitu kingine. Wakati alipokufa (Swalla Allaahu 'alayhi wa sallam) kizuizi hiki kikawa kimeondoka. Hilo ni kwa sababu Qur-aan ilikuwa tayari imeshakamilika na kudhibitiwa kabla ya kufa Mtume (Swalla Allaahu 'alayhi wa sallam). Baada ya hapo waislamu wakawa wameziandika Hadiyth ili kuzilinda zisipotee. Allaah awalipe kwa hilo kwa kule kulinda Kitabu cha Mola Wao na Sunnah za Mtume wao (Swalla Allaahu 'alayhi wa sallam) visipotee na kuchezewa.

Kusherehekea Maulidi ni alama yenye kuonesha kumpenda Mtume ('alayhis-Salaam)

7- Kusherehekea Maulidi ni alama yenye kuonesha kumpenda na ni moja katika alama yake. Kitendo cha kudhihirisha kumpenda Mtume (Swalla Allaahu 'alayhi wa sallam) kimewekwa katika Shari'ah.

Tunajibu hilo kwa kusema ni jambo lisilokuwa na shaka kwamba kumpenda Mtume (Swalla Allaahu 'alayhi wa sallam) ni jambo la wajibu kwa kila muislamu. Ni wajibu kwa kila muislamu kumpenda zaidi ya anavyojipenda yeye mwenyewe, mtoto wake, baba yake na watu wote. Lakini hata hivyo hilo halina maana ya sisi kuzua kitu ambacho hatukuwekewa katika Shari'ah. Kumpenda kunapelekea kumtii na kumfuata. Hiyo ni moja katika alama kubwa za kumpenda. Mshairi amesema:

*Lau mapenzi yako yangelikuwa ya kweli ungelimtii
hakika ya mwenye kupenda juu ya anayempenda humtii*

Kumpenda Mtume (Swalla Allaahu 'alayhi wa sallam) kunapelekea mtu akazihuisha Sunnah zake na kuziuma kwa magego na kujiepusha na maneno na matendo yanayoenda kinyume nazo. Ni jambo lisilokuwa na shaka kila kinachoenda kinyume na Sunnah zake ni Bid'ah yenye kulaumiwa na ni maasi ya wazi kabisa. Katika hayo kunaingia pia kusherehekea kuzaliwa kwake na Bid'ah nyinginezo. Mtu kuwa na nia nzuri hakuhalalishi kuzua katika dini. Dini imejengwa juu misingi miwili:

Wa kwanza: *Ikhlaasw.*

Wa pili: Kufuata.

Allaah (Ta'ala) amesema:

بَلَىٰ مِنْ أَسْلَمَ وَجْهَهُ لِلَّهِ وَهُوَ الْمُحْسِنُ فَلَهُ أَجْرٌ إِنَّ رَبَّهُ وَلَا حَوْفٌ عَلَيْهِمْ وَلَا هُنْ يَحْزُنُونَ

"Naam! Anayeusalimisha uso wake kwa Allaah na ilhali yeye ni mwenye kutenda wema basi atapata ujira wake kwa Mola wake na

wala haitokuwa khofu juu yao wala hawatohuzunika." (02:112)

Kuusalimisha uso ndio kumtakasia 'ibaadah Allaah, *Ikhlaasw* na *Ihsaan* ni kumfuata Mtume (Swalla Allaahu 'alayhi wa sallam) na kuafikiana na Sunnah.

Kusherehekea Maulidi ni uhamasisho wa kumuiga Mtume (‘alayhis-Salaam)

8- Miongoni mwa shubuha zao wanasema kusherehekea Maulidi na kusoma historia ya Mtume (Swalla Allaahu ‘alayhi wa sallam) katika mnasaba huu kuna mahamasisho ya kumuiga na kumtii.

Tunawajibu kwa kuwaambia kuwa kusoma historia ya Mtume (Swalla Allaahu ‘alayhi wa sallam) ni kitu kinachotakikana kwa kila muislamu kwenye maisha yake yote. Ama kufanya hivo kwa kukhusisha siku maalum - pasina kuwepo dalili ya ukhusishaji - ni jambo la Bid‘ah. Mtume (Swalla Allaahu ‘alayhi wa sallam) amesema:

"Kila Bid‘ah ni upotevu."

Bid‘ah haileti matunda yoyote zaidi ya shari tupu na kumuweka mtu mbali na Mtume (Swalla Allaahu ‘alayhi wa sallam).

Khitimisho

Ufupisho ni kwamba kusherehekea kuzaliwa kwa Mtume, pasina kujali aina na sura mbali mbali zinazotumiwa katika kufanya hivo, ni jambo la Bid'ah na ni maovu. Ni wajibu kwa waislamu kulikemea na kukemea Bid'ah nyinginezo. Badala yake wajishughulishe na kuhuisha Sunnah na kushikamana nazo bara bara.

Mtu asidanganyike na wale wenye kueneza Bid'ah hizi na kuzitetea. Hakika kufanya hivi kunawafanya watu hawa wanapata uchangamfu wa kueneza Bid'ah zaidi kuliko uchangamfu wanaoupata katika kuhuisha mambo ya Sunnah. Bali huenda wasitili umuhimu wowote kabisa wa kuhuisha Sunnah. Kwa hivyo haijuzu kumfuata wala kumuiga yule anayeeneza Bid'ah. Haijalishi kitu hata kama wenye kufanya hivo watakuwa ndio wengi. Anayefuatwa na kuigwa ni yule mwenye kufuata mwongozo wa Sunnah katika Salaf-us-Swaalih na wafiasi wao. Ijapokuwa watakuwa wachache wenye kufanya hivo. Kwani haki haijulikani kwa kuwaangalia watu, kinyume chake wenye haki hujulikana kwa kuiangalia haki. Mtume (Swalla Allaahu 'alayhi wa sallam) amesema:

"Hakika yule atakayeishi katika nyinyi basi atakuja kuona tofauti nyingi. Hivyo basi, jilazimieni na Sunnah zangu na Sunnah za makhaliyfah wangu waongofu baada yangu. Ziumeni kwa magego yenu. Tahadharini na mambo ya kuzua! Hakika kila Bid'ah ni upotevu."

Mtume (Swalla Allaahu 'alayhi wa sallam) ametubainishia katika Hadiyth hii tukufu ni kina nani tunaotakiwa kuwaiga. Halafu akabainisha kuwa maneno na matendo yote yanayoenda kinyume na Sunnah ni Bid'ah na kwamba kila Bid'ah ni upotevu. Lau tutaangalia sherehe ya mazao ya Mtume tutaona kuwa hayana msingi katika Sunnah ya Mtume wa Allaah (Swalla Allaahu 'alayhi wa sallam) wala katika Sunnah ya makhaliyfah wake waongofu. Kwa hivyo ni katika mambo ya kuzua na ni katika Bid'ah zenye kupotosha. Msingi huu unaopatikana katika Hadiyth hii umetolewa dalili na Kauli Yake (Ta'ala):

يَا أَيُّهَا الَّذِينَ آمَنُوا أَطِيعُوا اللَّهَ وَأَطِيعُوا الرَّسُولَ وَأُولَئِكُمْ هُمُ الْمُكْتَمِلُونَ فَإِن تَنَازَعْتُمْ فِي شَيْءٍ فَرُدُّوهُ إِلَى اللَّهِ وَالرَّسُولِ إِن كُنْتُمْ تُؤْمِنُونَ بِاللَّهِ وَالْيَوْمِ الْآخِرِ هُنَّ ذُلِّكَ حَيْثُ وَاحْسَنُ تَأْوِيلًا

"Enyi mlioamini! Mtiini Allaah na mtiini Mtume na wenyewe madaraka katika nyinyi. Mkizozana katika jambo basi lirudisheni kwa Allaah na Mtume mkiwa mnawaminii Allaah na Siku ya Mwisho. Hivyo ni (njia) bora na matokeo mazurizaidi." (04:59)

Kurejea kwa Allaah ni kurejea katika Qur-aan na kurejea kwa Mtume (Swalla Allaahu `alayhi wa sallam) ni kurejea katika Sunnah baada ya kufa kwake. Qur-aan na Sunnah ndio marejeo wakati wa kuzozana. Ni sehemu gani katika Qur-aan na Sunnah kitu kinachotolea dalili kuonesha kuwa inafaa kusherehekeea mazao ya Mtume?

Lililo la wajibu kwa yule mwenye kufanya hivo au kuonelea kuwa ni jambo zuri atubu kwa Allaah (Ta`ala) na aachane na hilo na Bid'ah nyinginezo. Hii ndio sifa ya muumini anayetaka haki. Kuhusiana na yule mwenye kufanya ukaidi na jeuri baada ya kuwa hoja imekwishamsimamia, huyo hesabu yake iko kwa Mola Wake.

Tunamuomba Allaah (Subhaanahu wa Ta`ala) aturuzuku kushikamana na Qur-aan na Sunnah mpaka siku tutakutana Naye.

Swalah na salaam zimwendee Mtume wetu Muhammad, ahli zake na Maswahabah zake.